

Ibarretxek proposatutako metodoa «zuzena» dela EAJrentzat dio Egibarrek

EAJk batzar nazionalean finkatutako ildo politikoari eutsiko diola esan du

Eduarne Begiristain / Gasteiz

EAJko barne egoera oso «lasaia» dela eta inolako «barne krisirik» ez dagoela adierazi zuen atzo Joseba Egibar EAJko bozeramaileak. Horren ildotik, EAJk bere batzar nagusian zehaztutako apustu politiko berarekin jarraitzeko asmoa duela esan zuen. Halaber, Ibarretxek proposatutako metodoa «zuzena» dela EAJren ponentziaren baitan baieztatu zuen.

JOSEBA EGIBAR EAJko bozeramaileak atzo azaldu zuenez, ez dago inolako barne krisirik alderdian eta EAJren barruko egoera «oso lasaia» dela gaineratu zuen. Era horretan Egibarrek ukatu egin nahi izan zuen EAJk barne zatiketak dituenik, baita Arzalluzek EBBko presidentzia utziko duenaren inguruko zurrumurruak ere.

Alderdi jeltzalearen barruan eztabaida ematen ari den ala ez galdetuta, Egibarrek erantzun zuen batzar nagusian finkatu zela alderdiaren estrategia politikoa eta horrekin jarrituko dutela.

EAJren ildo politikoaren aldaketaz galdetuta, berriz, Egibarrek esan zuen bere alderdiaren «elikatzaile politikoa» ponentzia politikoa dela, eta bertan alderdien arteko mahaia osatzearen inguruan Juan Jose Ibarretxe lehendakariak proposatutako «metodoa» dagoela. Metodo hori EAJri «zuzena» iruditzen zaio-la gaineratu zuen bozeramaile jeltzaleak.



Euzkadi Buru Batzarraren bilera, artxiboko argazki batean.

JOSEBA EGIBAR

■ ■ ■ «EAJren barruan entzun diren abotsak ez dira ohartzen hau alderdi serioa dela, ez oilategia»

■ ■ ■ «Ikusi egin beharko da EHrekin akordioak ditugun berri bakoitzean zer egin»

Barruko iritzi desberdinak

Azken atentatuaren ostean EAJren barruan hainbat ordezkariak egindako adierazpenek alderdiaren zatiketa sortu dutenik ukatu zuen. «Azken egunotan zenbait ahots entzun dira, baina askotan ez dakit ohartzen diren alderdi politiko berekoak garela eta EAJ alderdi serioa dela, ez oilategi bat», esan zuen.

Horren haritik adierazi zuen EAJko bozeramaile den heinean, ez dela sekula sartuko, publikoki bederen, EAJko afiliatu batek egindako adierazpenekin.

Egibarrek EAJrekiko errespetua eskatu zuen «Batzar nagusia egin berri duen eta batzordeetako buruak aukeratu berri dituen alderdi batentzat».

Bestalde, Joseba Egibarrek azaldu zuenez, Durangoko atentatuaren ostean sortutako egoeraren inguruan, tokian tokiko udalen kasuak aztertuko dituztela, erabakitzeke EHrekin dituzten akordioak apurtuko dituzten ala ez. «Ikusi beharko da EHrekin akordioak ditugun leku bakoitzean zein alkate, alderdikide eta zinegotzi dauden eta beraiekin hitz egitea pentsatzen dugu», agertu zuen Egibarrek.

«Prozesu politikoa, etapa bat itxi arren, ez da alferrikakoa izan», dio Arzalluzek

Joseba Arruti / Bilbo

XABIER ARZALLUZ EBBko presidenteak atzo aipatu zuenez, Euskal Herrian abian jarritako prozesu politikoan «etapa bat amaitu den arren ez da alferrikakoa izan; guztiok esperientzia bat atera dugulako, ENAMek barne». Arzalluzen ustez, «su-etenak jendea, HBko kideak ere bai, bakera ohitzea ekarri zuen eta hori oso garrantzitsua da aurrera begira». «Dena den hasieratik genekien prozesu hau zaila eta luzea izango zela, eta interesak izan dira oztopatu dutenak», adierazi zuen.

Arzalluzek atzo arratsaldean egin zituen adierazpenok, Joaquín Navarro epailearen *Buenos días Euskadi* liburuaren aurkezpenean. Esan zuenez, prozesuaren aurka egiteko «diktadura mediatiko» bat dago eta «erabateko gerra» zabaldu da bere eta EAJren aurka. «Diote, EAJk ez duela sinesgarritasunik izango zuzendaritza aldatu ezean. Ez dut horrelakorik ikusi nire ibilbide politikoan», iritzi zion.

Azkenik, zenbait hedabidek esandakoa ukatu zuen: EBBren azken bileran «eztabaida mingotsa» egon zela alegia. Arzalluz hitz egiten ari zela bi lagunek presoan aldeko kartelak erakutsi zituzten.

BBB EAJren ildo politikoarekin bat

EAJren BBBk gezurtatu egin du, BBBk EAJren estrategia aldatzea bultzatzen duenik, atzo hainbat egunkariak zabaldu zuten gisan. Ildo horretan, euren «arbuioa» azaldu zuen BBBren inguruan egiten ari den «erabileragatik». «Agerian utzi nahi dugu Bizkaiko EAJk tinko eusten diola alderdiaren ildo politikoari eta onartutako ponentziari», dio atzo igorritako oharra. Izan ere, alderdiaren zuzendaritzak hartzen dituen erabakietan parte hartzen dutela gogoratu dute: «Eta erantzule gara EAJk egin eta esan duen guztian, eta baita uneoroko estrategia politikoan ere».

Larreina: «Ibarretxek ez du finkatzen EAren itun politika»

E.B. / Gasteiz

EA-KO bozeramaile Rafa Larreinak atzo adierazi zuenez, EAren itun politikoa ez du finkatzen ez Ibarretxe lehendakariak, ez PPK ez ETAK. Haren hitzetan, EAren itun politikoa alderdiaren Gobernu organuek, Asanbladak eta Batzorde Iraunkorrak zehazten dute. Esan zuenez, ez Aznarrek, ez Iturgaitzek ez Mayor Orejak ez dute «pitin batean ere EAren jarrera aldaraziko».

Gauza bera esan zuen ETAren inguruan, «presionatzen duena presionatzen duela ere», iritzi zion.

Halaber, Larreinak azpimarratu zuen EAK Ibarretxe-rekin Gobernu programa bat hitzartua duela eta hori betetzeko «konpromisoa» duela.

Hainbat udaletan EAJk eta EAK EHrekin dituzten akordioak haustearan inguruan galdetuta egin zituen adierazpenok Rafa Larrei-

nak. Horren hairitik Larreinak adierazi zuen bere alderdiaren jarrera «koherentea eta denboran mantendua» dela. «EA bide baketsu eta demokratikoak defendatzen dituen edozein alderdi politikorekin harremanak izatearen alde dago», iritzi zion. Hori horrela izaki, EAKo bozeramaileak azaldu zuen ideia horiekin bat egiten ez duten indar politikoekin EAK ez duela ardura politikorik izango udal gobernuetan.



JOSEBA OLALDE

Rafa Larreina.